

POLVS ARCTICVS.

24

Nova Zembla.

dum scribit dictus Zieglerus. Idem Mare Insulæ ab Occidente proximum, brevis & scopulis plenum, Icarium: & Insulam in eo Icariam, ab Incolis nominari scribit. Insula hæc hoc nostro tempore denuo innotescere incipit, idque Anglorum auspiciis. *Nova Zembla* insula est sita sub gradu 76. Summa hinc inclementia aeris atque intolerabile & intensissimum frigus. Regio deserta, sylvestris, rigida, molesta. In hac nec frondes nec gramen crescit, in hac etiam nulla Animalia præter carnivora reperiuntur, qualia Vulpes & Ursi, quorum non tantum in hac Insula, sed in plerisque regionibus Septentrionalibus magna copia est. Sunt & Belluæ marinæ: quæ vasto corpore Bovisque magnitudinem excedentes, *Walrussen* vulgo dicuntur: os habent leoninæ speciei, pellem villosiorem, quatuor pedes, duos dentes ex parte oris superna prominentes, planos, duos, candentes, ut Elephantinis precio non cedat. Freta hinc, *Fretum Weygats*, *Forbissieri* & *Davis*. *Fretum Weygats* protenditur ad Ortum usque; ad Crucis dictum angulum, deinde ad Arctapeliotem usque ad Dissidii angulum, paulo ad Orientem vergentem. In Australis lateris Weygats continente Gulielmus Barendsonius aliquos agrestiores homines reperit Samiutas appellatos. Vestium horum quibus utuntur forma, similis est illi quam nostri pictores sylvestribus Hominibus tribuunt, minimè tamē sylvestres sunt, sed bono intellectu præditi. Amiciuntur pellibus Rangiferorum à capite usque ad pedes. Ut plurimum brevi sunt corpore, latâ planâque facie, parvis oculis, brevibus cruribus & divaricatis, agilesque sunt in cursu & saltu. Rhedas habent in quibus unum aut duos Rangiferos jungunt, qui unum aut alterum hominem insidentem tam celeri cursu trahunt, ut nullus nostrorum equorum æquari illis possit. *Fretum Forbissieri* à Martino Forbissiero Anglo nomen accepit, qui anno MD LXXVII, transitum ad Cathaiam per Septentrionem quærens, pervenit ad Fretum quoddam, in quo reperit & Insulas & Homines plurimos, de quibus pauca subjiciemus. Homines ejus loci ab omni cultu alieni, crudis ferarum ac piscium carnibus vescuntur. Vestiuntur pellibus ferarum venatione captarum, herbas etiam crudas bestiarum in morem devorant. Tentoria eorum pellibus Balænarum teguntur, perpetuè ibi nubes & frigus asperissimum. Canibus qui Lupos nostros specie referunt, sub jugum missis, utuntur ad res necessarias super glaciem advehendas. Arma illis sunt arcus, sagittæ & funda. Nulla ibi ligna, Cervi multi: homines terram non colunt, contenti rebus quas sponte producit: venatione vivunt: potus illis sanguis ferarum est calidus, aut aqua glaciei: nulli istic fluvii, nullæ scaturigines, quod violentia frigoris terram ita concludat, ut aquarum scaturigo erumpere nequeat. Homines sunt magni laboris, venatores strenui & præsertim in aucupis astutissimi: utuntur certo navigii genere ex coriis confecto in quo solummodò homini locus: cui unico tantum remo opus est. Dextrâ Instrumentum tenet quo aves telo jaculatur. Hujus exemplum in Angliâ visum. *Fretum Davis* itidem à Johanne Davis Anglo appellationem accepit, qui anno 1585 & duobus proximis littora Americæ, vel potius Groenlandiæ Circum spectantia à 53 gradu ad 75 transitum illac in Chinam scrutando perlegit. Quæ de Euripis illis quatuor in Tabulâ vides, desumpta sunt ex Itinerario Jacobi Cnoxen Buscoducensis, qui refert Minoritam quandam Anglum Oxoniensē Mathematicum terras Polo circum vicinas descripsisse & astrolabio dimensum esse in hanc sequentem formam ferre, uti ex Jacobo collegit Mercator. Euripos illos quatuor dicit tanto impetu ad interiorem voraginem rapi, ut

Naves